

SAV Steinhaus - ACD Val Badia

Inviato da Jonas
Ultimo aggiornamento lunedì 08 agosto 2022

Sabda, 07. mà 2022

N resultat esageré

Te na sabeda sèra buna cialda da d' aisciöda él gnü soghé la partida de campionat danter l' SAV Steinhaus y l' ACD Val Badia.

De sabeda sèra él gnü soghé la partida de campionat de 2^a categoria danter l' SAV Steinhaus y l' ACD Val Badia. Chèsc è l' pröm iade in chèsc ann che l' ACD Val Badia süga de sabeda sèra y chèsc nü orar ne ti á nia porté fortuna te na partida dominada dala squadra todèscia.

La partida mèt man y l' ACD Val Badia passa bel atira in vantaje al 1^a. Dò che Denicolo vègn metü in movimènt da na bela passada de Schrott, él chèsc che subèsc n fal t area avversaria y insciö ti vègnel dé na trata dai 11 metri ala squadra ladina. Fersuoch se tol sö la inciaria da trá l' 11 metri y le trasforma cun na bela trata tl ciantun bass de porta . Ara stá 0-1. Mo le vantaje ne dóra nia dî deache l' Steinhaus recuperèia bele al 5^a y se porta söl 1-1 cun na trata de cé che röva al incrujada di lègns dô n bel cross da fora d' area che è rovè avisa sön l' cé dl' atacant. Al 18^a tompl spo l' 2-1 por la squadra da Steinhaus che mèt ite n cross bass amesa l' area dl' portier ladin olache n sogadú todèsch ti è ciamó al' ultim momènt da ruvé sön l' palé y le trá te porta. La situaziun è atira gnüda ribaltada dala squadra che ocupèia l' 2^a post te classifica. Al 29^a él indô l' Steinhaus che á na gran ocajiun cun n sogadú che pèia ia dal zènter dl' ciamp, driblèia n pèr de sogadus ladins y lascia pié ia na bela trata che vá sura porta fora. 2 menüc dedò, al 31^a, él la Val Badia che á na ocajiun cun na bela aziun che i porta cina dan porta avversara, mo la trata de Schrott vègn parada dal' portier avversar. Al 45^a ti vègnel "scinché" na trata dai 11 metri ai padruns de ciasa por n fal che n defensur ladin á fat sön l' avversar che è mez meter fora dl' area dl' portier. N gran fal dl' arbiter. La trata dai 11 metri vègn eseguida, l' palé röva te porta y l' Steinhaus se porta sön l' 3-1 püch dan la fin dl' pröm tèmp. Do la trata dai 11 metri él l' arbiter che sciüra la fin dl' pröm tèmp sènza dé recuper. L' secundo tèmp mèt man cun la proscima ocajiun por la squadra todèscia che röva cun dèr na bela aziun dan porta y lascia pié ia na gran trata che vá de dèr püch dlungia porta ia. Al 51^a él spo l' Steinhaus che se porta söl 4-1. Sön n cross ite t area él Ferdigg che prô da apié l' palé, mo al ti sciampa al' ultim y insciö él l' atacant avversar che mæss ma plü le sburlé te porta. Al 67^a él indô i todèsc che prô da ti sciampé ala defenjiun ladina y canche ai è dan porta prôi la trata mo chèsc iade él Ferdigg che salva la porta ladina cun na grandiscima parada. Al 69^a ti è la squadra de ciasa cinamai da se porté sön l' 5-1. Sön na gran trata di todèsc ti è Ferdigg da tigni sö l' palé, mo nia da l' tigni tles mans, y insciö pó l' atacant madèr sburlé l' palé te porta sènza gragn problems y porté süa squadra sön l' 5-1. Do chèsta aziun ti è la Val Badia da tigni dèr bun l' ciamp y ti ultims 25 menüc ne ti è l' Steinhaus plü da fá nia de prigoros. Y insciö, al 94^a, dô 4 menüc de recuper, él l' arbiter che sciüra la fin dla partida. Na partida cun n resultat nia dl' döt iüst deache la Val Badia ne á nia soghé mal y se á incé defenü dèr bun, mo ala fin él impó tlèr che l' Steinhaus á na squadra cun plü cualité.

SAV Steinhaus - ACD Val Badia: 5 - 1

Formaziun ACD Val Badia: 1. Ferdigg Rene, 2. Conrater Heinrich, 3. Kastlunger Mattia, 4. Graffonara Simon, 5. Fersuoch Kevin, 6. Barbolini Florian, 7. Valentini Luca, 8. Stampfer Alex (C) (dal 73^a 13. Ploner Matteo), 9. Mayr Marc (dal 68^a 15. Pizzinini David), 10. Denicolo Davide (dal 46^a 14. Ploner Alexander), 11. Schrott Max.

Alenadú: Crepaz Gianni.

Proscima partida: La proscima partida vègn sogada in domènia, ai 15 de má, dales 16:00 cuntra l' Taisten Welsberg sön l' ciamp dal palé "Pradel" a San Martin de Tor.